

rait et de tout son pooir garderait lez choses contenues an ces presentes lettres et painrait tous ceaulz, quil saivrait meffaisant contre lez dites trues ou qui li seront denonciét, et en ferait tout ceu que ordeneis en serait par lez noef. (31) Au queil chaivetenne ou a son commandement tuit cilz, qui sont et seront de ces presentes trues, doivent ourir toutes lours forteresses et baillier confort et ayde pour faire et aicomplir toutes les choses contenues en ces presentes lettres toutes fois, que mestier serait et requis an seront; et doivent laixier et aidier a painre en lour terres, en lour villes, citeis, forteresses et autres lieux tous malfaitours, partout ou com les pourront troveir, et faire baillier a eaulz et a lour gens vivre pour fuer souffixant. (32) Et devons nous li signors et bonnes villes desus nommeis metre dez maintenant an depost a Mes an lieu certain teile somme dergent, com li dis noef regarderont, li queilz argens serait mis et amploies en la maniere, que li noef lorderont pour acomplir lez choses necessaires auz dites trues. Et avec ceu toutes autres fois, que li noef regarderont, que boins serait de raivoir autres sommes dergent, nous signours et bonnes villes an devons baillier teil cantitei, com par les noef serait requardeis, que a chescun en aipartainrait. (33) Et est auci a savoir, que li paix, que dairiennement fut faite et raporteie a Mes par nous roy de Boeme et les legaulz de nostre saint peire le pape de la werre, que estoit entre nous duc de Loherenne et merchis et conte de Bair dessus dis, se doit tenir et aicomplir, et devons nous dus et contes faire nos hommes, nos subgis et toz nos aidans taisans dune part et daitre tout en la maniere, que contenue est ens lettres, que sor ceu sont faites¹. (34) Et nest mie lentente de nous signours et bonnes villes dessus nommeis, que se aucuns pues le jour de la feste saint Remey dairiennement passeie avoient meffait a nous, a aucuns de nous ou ai autres, queilz quil fussent, qui fussent de ces presentes trues, ques quil naveroit esteit fait en droite weirre overte sus lour anemins, que cil, sus cui om averoit meffait, an teil cais nen fuissent aidressies au rowairt des noef ou de la plus grant partie deaulz. Et ad ceu faire nous les deveriens aidier, pues que li malfacteurs nen vouroit venir a droit senz en riens corrompre ne enfraindre ces presentes trues, se dons nappairoit, que mise ou paix en eut esteit faite.

1) Anfang 1343 willt König Johann in Metz. Die Urkunde selbst habe ich nicht auffinden können.